

*“Miserikordia mi ke, no sakrifisio” (Mt 9:13).
Obranan di Miserikordia riba e kaminda di Hubileo*

MENSAHE DI KUARESMA 2016

Mi rumannan tur den Kristu,

Masha tantu bes den nos bida, nos tur tin e deseo profundo di por sinti Miserikordia di Dios den nos bida. Nos ke pas den nos bida i nos kier sinti nos stimá i protehá den e amor grandi di Dios.

Pa motibu di e nesesidat grandi aki, Papa Fransisko a duna mundu e regalo di un Aña di Miserikordia. Den su anunsio di e aña spesial aki, Santu Papa a rekorda nos ku *“Hesus di Nazareth, pa medio di Su palabranan, pa medio di Su akshonnan i Su persona total a revelá e Miserikordia di Dios”*. I ku enfasis Santu Papa a pidi nos pa Kuaresma di e aña aki, *“pa nos tur biba mas intenso, mas profundo e momentu di selebra i eksperiensia Dios su Miserikordia”*.

E miserikordia di Dios ku ta sin limite, sin distinsjon di persona. Hesus mes a demostrá esei for di Su prome milager na e kasamentu di Kanaan, kon ela kura e homber paralitiko (Luk 5: 17-26). I ku e akshon di e bon samaritano, un ehempel di miserikordia real den práktika pa nos tur (Luk 10: 25-37), otro ta e karne perdí (Luk 15: 1-70) i e parabola di e yu perdí nos ningun no por lubida (Luk: 11-32)

Pesei Papa Fransisko den su mensahe pa e tempu di Kuaresma ta pone tur atenshon riba Miserikordia, e parti di nos bida ku ta hasi nos realmente siguido di Kristu den praktika.

Den mi 15 aña komo boso Obispo mi hasi bishita pastoral na tur isla, bishitando skolnan, gruponan pastoral i otro organisashonnan den nos parokianan. Mi a topa boso dedikashon grandi, boso sentido sosial, boso karidat pa otronan den boso parokia. Pues e sentido di miserikordia **ta biba**, pero nos mester husa e tempu bendishona ku nos ta kuminsa dia di sinishi, pa profundisa esaki mas tantu posibel pa duna e Aña di Miserikordia frutanan na abundansia.

I pa logra un kresementu grandi mi tin algun rekomendashon di kurason i esun prome ta di pone mas tempu disponibel pa orashon. Habri bo mes den bo orashon pa e presencia di Kristu resusita. Laga E inspira bo pa sigui su pasonan miserikordioso.

Na di dos luga mi ke stimula un peregrinashon di kada parokia of gruponan den parokia na e misa ku nos a dedika riba kada isla komo e sentro di Aña di Miserikordia i asina stimula personalmente i serka otronan e deseo di konbershon.

E di tres rekomendashon ta pa nos por rekonose nos faltanan i buska pordon den e Sakramentu di Rekonsiliashon. Ta un peso ta kita for di nos kurason den un bon konfeshon i e ta bira asina un bendishon spesial pa nos tur den kuaresma.

Un atenshon spesial i apart mi ke pidi na mes tempu pa e ***Obranan di Miserikordia***.

Dios su miserikordia ta inspira nos pa nos stima nos prohimo mas profundo i pa dedika nos mes na loke tradishon di Iglesia ta yama *“Obranan di miserikordia spiritual i korporal”*, kier men den kurpa i den spiritu.

Mi ke rekorda boso e obranan aki.

Esnan spiritual ta: instruí esnan ku mester di formashon, duna konseho na esun ku ta duda, papia ku pekadornan, karga kosnan malu ku pasenshi, pordona ofensanan sin problema, duna konsuelo na esnan aflihi i resa pa bibu i mortonan.

Esnan korporal ta duna esnan ku tin hamber di kome, duna esun ku tin set di bebe, bisti esun sunu, duna dak na esun ku no tin, bishita enfermonan, duna sosten na presonan i dera defuntunan.

Rumannan,

Papa ta rekorda nos ku misericordia “ta e ley profundo ku ta biba den kurason di kada hende ku ta wak sinseramente den wowo di su rumannan riba e kaminda di bida”. Ora nos tur en berdat wak nos rumannan den nan wowo i rekonose Dios su kara den nan, nos ta lanta otro, nos ta sostene otro, stimula otro i nos ta pasa e amor grandi di Dios na un manera praktiko i real pa tur nos otro rumannan.

Dios nos Tata a priminti di ta ku nos te na fin di nos bida, Hesus a sigura nos esei. Ela priminti pas i alegria na tur ku ta sirbi otro i stima otro den su nomber.

Mi deseo sinsero i profundo pa kua mi ta resa pa nos tur personalmente, ta pa nos tur por sinti e pas i alegria ei di Dios Su misericordia den nos bida.

Boso sirbido den Hesus i Maria.

Mgr. Luis A. Secco, sdb.
Obispu di Willemstad.